

Minister Otmar Oduber riba Dia di Betico

A muestra un imagen di Betico social, familiar y deportivo

DIASABRA 25 di januari, Dia di Betico, Minister Otmar Oduber tabatin e honor di dirigi palabra durante e acto protocolario na Plaza Libertador Betico Croes, recordando y celebrando e fecha natal di e gran lider Betico Croes.

E mandatario a dicidi di enfoca mas riba e parti social, familiar y deportivo di e gran estadista di nos isla, mustrandu asina un aspecto diferente di un di e lidernan di mas grandi di Aruba.

El a inicia bisando cu diasabra a conmemora pa di 22 aña consecutivo e fecha natal di un di e politiconan di mas grandi cu Aruba a conoce y cu a dedica su bida na bienestar di e comunidad aki y e lucha di loke ta destino di cada ciudadano riba e pais aki.

“Awe mi kier para un rato keto na recorda Betico Croes como e persona humilde, trankilo y di pueblo cu e tabata. E trayectoria politico nos a scucha aña tras di aña cu Betico hunto cu otronan a lucha pa por logra e Status Aparte cu awe nos tur ta disfruta di dje y ta disfruta na grandi.

Betico no solamente tabata un politico dedica, pero tabata un persona cu ta stima su cultura, tabata stima su musica, tabata adora su deporte y tabata masha activo riba e tereno social tanto na Aruba como den exterior”, Minister Otmar Oduber a expresa.

El a conta cu den su añanan como estudiante na Hulanda for di eynan caba e tabata demostra e amor cu e tabatin pa nos cultura caminda cu el a lanta un grupo tipico y despues ora el a regresa Aruba el a continua cu esaki y te awe ainda bo ta sinti su raiz cu Grupo di Betico.

Na Aruba, Betico a forma parti di diferente sector di deporte manera ping pong y voetbal, mustando asina cu apesar di tabata un politico cu tabata traha cu alma y curpa, e tabatin tempo semper pa dedica na

diferente faceta di nos cultura y nos deporte na Aruba.

Algo cu e mandatario a menciona ta cu Betico Croes a sa di lanta nos Dande cu aña pasa a celebra e di 40 aña di Festival di Dande.

Minister Oduber a expresa cu cada un politico, no ta importa di ki color, di ki raza of di ki partido e ta representa, “awe nos tur ta hunto y nos tur ta braza otro y nos tur ta demostra cu banda di ta un politico tanto aña pasa, tanto awe y den futuro nos tur ta keda forma parti di e ciudadanía Arubano cu ta stima e pida baranca aki”.

Betico a demostra y atraves di tur loke el a muestra, a pone cu awe na un manera oficial riba su fecha natal caminda cu e lo tabata celebrando su di 76 aña, pa nos por ta hunto y realiza cu hopi biaha como politico bo ta wordo huzga, pero bo bida tambe ta uno familiar y social. Un politico ta keda forma parti di un famia tambe y e famia ey ta keda e razon di existencia, Minister Oduber a indica.

El a pidi pa tur reflexiona riba e bida di un di e gran politiconan cu nos a conoce na Aruba cu a dedica nan bida na Aruba, a sacrifica nan famia pa cierto momento por dedica na e pais aki, pa nos tur realiza cu nos tur ta keda e Arubiano cu ta traha y ta stima nos isla, sin importa di ki partido politico, pasobra ta un bandera tin y Betico a sa di uni nos bou di e bandera aki. Finalizando, Minister Otmar Oduber a recorda un anecdota familiar cu a wordo conta dor di un di Betico su yiunan y cu ta tipifica e bida di Betico y cu ta refleha riba cada un politico na Aruba cu ta biba cu amor pa nan pueblo.

Tempo Betico su yiunan tabata hoben, Betico porfin riba un fin di siman a bisa nan cu nan ta bay core auto como famia, nan a sali berdad como famia, pero riba e ruta cu nan a keiro el a para, combersa y keda cerca famianan y dedica mas

n-e famianan na caminda cu supuestamente el a dedica na su famia.

Esaki ta demostra e amor cu Betico a demostra na su famia, su famia cu ta Aruba y e senti-

mento aki mester wordo refleha riba cada un politico cu ta biba riba nos isla.

